

Oqaluuserisassat pillugit nassuiaat.
(Inatsisartut Siulittaasuat)

Siulittaasoqarfiup aalajangerpaa pingasunngorneq ulloq 2. april nal. 13.00-imiit ataatsimiiffiussanngitsoq akunnerli apeqquteqarfiusinnaasoq attatiinnerneqarluni.

Taamaalilluni imm. 131: Kalaallit Nunaanni nunat allamiut pillugit inatsisip allannguutissaata atuutilernissaanut aalajangersagaliornissaq pillugu Inatsisartut aalajangernissaat pillugu siunnersuut (Nunamut isernissamut malittarisassat ataatsimoorussat allassimannngitsut (isernissamut malittarisassat) pillugit peqqussummik pilersitsinissaq, paasisassarsiorluni suliaqarnerit assigisaallu pillugit maleruagassanik aalajangersaanissamut pisinnaatitaaffilliinissaq), aqagu 2. april kisiartaalluni oqaluuserineqartussaagaluq aqaguagumut ulloq 3. aprilimut nuunne-qarpoq.

Siumut aamma Atassut kiisalu Inuit Ataqatigiit, Partii Inuit aamma Partii Naleraq tamarmik immikkut immikkoortumik nutaamik oqaluuserisassanut ilanngussisoqarnissaanik noqqaassuteqarsimapput. Siulittaasoqarfiup immikkoortut pineqartut oqaluuserisassanut ilanngunneqarnissaat akueraa.

Siumut aamma Atassummiit siunnersuut imm. 20-tut normulerneqarpoq, imalu qulequtaqarluni:

Naalakkersuisut suliffissaaleqinerup ataavartumik akiorneqarnissaanik siunertaqartumik ataatsimoorussamik pilersaarummik piaartumik sularinninnissamik peqquneqarnissaannik Inatsisartut aalajangiiffigisassaattut siunnersuut. Pilersaarummi Sanaartugassanut Iluarsagassanullu Aningaasaateqarfimmi aningaasat uninngaannartut inuiaqatigiit akornanni sulisinneqalernissaannik, nunaqarfinni aalisakkerivinnik sullissinissamut isumaqatigiissutinut aningaasaliissutit amerlineqarnissaannik kiisalu illersorneqarsinnaasumik aalisagartassat amerlineqarnissaannik imaqassaaq. Pilersaarut Inatsisartut ataatsimiinneranni maanna ingerlasumi saqqummiunneqassaaq.

Inuit Ataqatigiit, Partii Inuit aamma Partii Naleraq siunnersuutaat imm. 21-tut normulerneqarpoq:

Nunatsinni annertuumik suliffissaaleqinerup piaartumik ataavartumillu annikillisinneqarnissaa siunertaralugu Naalakkersuisut ataatsimoortumik periusissamik Inatsisartunut saqqummiussaqaqarnissaannik Inatsisartut aalajangiiffigisassaattut siunnersuut.

Immikkoortut 20 aamma 21 ataatsimoortillugit sularineqassapput, ulloq 8. april siullermeerneqariarlutik ulloq 30. april aappassaa.

Inuussutissarsiornermut Ataatsimiititaliaq oqaluuserisassani imm. 124-ip aappassaaneerineqarnissaa kinguartinneqarnissaanik qinnuteqarpoq. Siunnersuut qulequtaqarpoq: Uunga siunnersuut: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2014-imeersoq (tuniniaanissamik nittarsaassisarnermut inatsit)

Siunnersuut maanna ulloq 22. maj aappassaaneerneqassaaq ulloq 28. maj pingajussaaneerneqarluni.

Taasisarnerit eqqarsaatigalugit ilaasortat uku isumaqatigiissuteqarput:
Kalistat Lund, Inuit Ataqatigiit aamma Evelyn Frederiksen, Siumut kiisalu
Karl Lyberth, Siumut aamma Kuupik Kleist, Inuit Ataqatigiit.